

Lidrick Solognier lo toca na e benefit concert



ORANJESTAD- Lidrick Solognier tocado di drum y conga lo toca na e benefit concert. Carlos Bislip jr. hunto cu coleganan musico ta organisa un 'Benefit concert' cu musica varia. Esaki ta tuma luga na Cas di Cultura diasabra dia 16 di augustus y ta cuminsa 8'or y e intencion ta pa recauda fondo pa scol di musica Rufo Wever.

Sra. Solognier ta toca den banda 'Duro' y casi tur weekend nan ta toca, un banda di mas o menos 10 musico. Duro ta toca pa fiesta y otro evento. Esaki ta trece poco 'zakgeld' pa Lidrick cu ta un estudiante na Colegio Arubano. Tin ora ta poco druk pero te ainda el a logra di combina e bida di estudiante cu e trabou di musico. Y alabes e ta siña hopi di e otro miembronan

di e banda 'Duro' tocando Conga y Drum. Den siman e ta sigui les di piano cerca sr. Johnny Croes y les di Drum cerca sr. Bislip jr. Na Scol di Musica Rufo Wever.

Formacion musical

Sr. Solognier a cuminsa cu su formacion musical cu 4 aña. Entre otro cu les di poco despues cu les di drum y les di fio y curso di Timbal, Conga y Bongo. For di aña 2000 Sr. Solognier ta participa den festivalnan di Dande. Na cuminsamento tocando e Wiri y Tambu den e grupo "La Bomba". Na aña 2003 el a participa pa prome biaha como cantante di Dande cu e grupo "La Bomba" y a toca Tambu cu e grupo di Edseliene Figaroa. Na aña 2004 e la bolbe participa como cantante di Dande pero cu e grupo "Ritmo y Mas" bou

direccion di Sra. Figaroa. Y finalmente na aña 2005 el a bira Rey di Dande den categoria 10 pa 12 aña cu e grupo "Amor pa folklore" bou direccion di Danilo Vrolijk. Sr. Solognier a sigui duna presentacion musical hopi caminda y den cooperacion cu diferente artista local. Na e mesun aña e la cuminsa cu un curso di Timbal, Conga y Bongo, cerca Fio Wester.

Tayer na Maastricht

Na aña 2006 sr. Solognier a participa na un tayer di Pop y Jazz, cual a wordo duna pa un docente di Conservatorio di Maastricht. Na aña 2006 sr. Solognier a participa na un tayer di Chichi Peralta na Cas di Cultura y akinan tambe el a haya e oportunidad pa toca un tiki cu Chichi Peralta. Otro musician cu Lidrick a acompaña tabata Freddy

Franken, un musico di Puerto Rico, tambe el a bay toca na Hulanda na edad di 14 aña den edificio di concierto na Amsterdam pa e Nieuwjaarsbal pa La Reina. Tambe el a sigui un curso na Cuba pa un luna largo pa ritmo y instrumentonan Cubano. Mientras tanto sr. Solognier ta sigui tuma les di Drum y piano na Scol di musica Rufo Wever.

Entrevista

Sr. Solognier a wordo puntra si e ta kere ta dificil pa mucha haya les di musica pa cual e la contesta "Tin biaha si. Bo ta ripara cu mayornan no por paga e les of nan no ta motiva e yiu suficiente of e mucha no ta haya sa kico tur ta posibel. Tin ora tambe nan ta bisa un mucha cu e no ta bay haya trabou como musico, loke no ta berdad. Cerca mi, tempo cu mi tabata chikito,

mi tata, cu tambe ta musico, a haci esfuerso pa mi haya les, mi a cuminsa tuma les cerca sr. Pedro (Chencho) Kelly. Despues mi a bay Cas di Cultura. Bo tin cu haci poco esfuerso si pa busca oportunidad pa crece y siña mas. Un dado momento ta bon pa sigui studia afo."

Tambe a puntra sr. Solonier kico su deseo ta pa futuro y e la bisa "Mi kier sigui studia musica den futuro. Mi deseo ta pa bay studia na Berkley College na Merca of Conservatorio na Hulanda, pero tur esey ta depende si den futuro por haya un beca, ya cu e scol ey ta basta caro. Tambe mester haci un audietie pa por wordo acepta na un scol di musica den exterior. Kisas mi ta bay den direccion di percussion clasico pero mi no ta sigur ainda." □